

Kemi bërë një sondazh dhe AKR-ja është njëra nga tri partitë kryesore në vend, u tha Behgjet Pacolli delegateve të Kuvendit të Parë Zgjedhor të Grave të AKR-së. Kryetare e parë e Forumit u zgjodh Rita Hajzeraj

Gruaja kosovare do të jetë shtylla e partisë



Prishtinë, 24 nëntor - Në prani të 100 delegateve, Forumi i Gruas i partisë Aleanca Kosova e Re (AKR) e mbajti të premten Kuvendin e saj të parë zgjedhor. Kuvendi e zgjodhi Këshillin drejtues prej 23 anëtarëve, me mundësi zgjerimi, ndërsa kryetare me aklamacion u zgjodh Rita Hajzeraj.

Delegateve të pranishme iu drejtua edhe kryetari i AKR-së, Behgjet Pacolli. Ai i premtoi Forumit të Grave mbështetje në rrugën politike dhe shoqërore. "Gjithnjë kam pasur respekt për nënat dhe motrat. Ato kanë vuajtur dhe kanë qenë shtyllë e gjithçkaje në vend. Ju jeni dhe do të vazhdoni të mbeteni shtylla kryesore e AKR-së. Përkrahja ime për ju do të jetë e rezervuar dhe së bashku do të krijojmë një shoqëri për të na lakmuar të gjithë". Shefi i AKR-së më pas bëri të ditur se subjekti që drejton ai po fuqizohet çdo ditë e më shumë, duke u bërë njëra nga tri partitë kryesore në vend. "Kemi bërë një sondazh, i cili është shumë i saktë dhe AKR-ja tanimë është njëra nga tri partitë kryesore në Kosovë".

Delegatja Myrvete Llaloshi foli për rëndësinë e femrës në shoqëri, duke evokuar të kaluarën. "Femra shqiptare historikisht u bëri ballë të gjitha sfidave, ndërsa hyrja e saj në politikë nuk është risi, sepse ajo daton qysh nga mbretëresha ilire Teuta". "Kur flitet për gruan në Kosovë, nënkuptojmë 52 për qind të popullsisë, ndërsa kjo pjesë është lënë anash", vlerësoi ajo.

Kuvendin e përshëndeti edhe delegatja Bajnushe Banumshahu –Jetullahu, përfaqësuese e Komitetit të Grave të Verbra, e cila e falënderoi Behgjet Pacollin për dhënien e mundësisë kësaj kategorie që ajo të jetë e barabartë në shoqëri, duke qenë aktive në strukturat e Aleancës për Kosovën e Re. "AKR-ja është parti që është ofruar për të na ndihmuar dhe integruar në shoqëri, që ne të ndihemi të barabarta. Z. Pacolli tregoi ndjeshmëri ndaj kësaj kategorie të njerëzve dhe ne, Komiteti i Grave të Verbra të Kosovës, do të jemi me të".

Kryetarja e porsazgjedhur, Rita Hajzeraj, tha se beson që në të ardhmen Forumi i Gruas i AKR-së do të arrijë ta avancojë faktorin grua, në mënyrë që ajo ta zërë vendin e merituar në shoqëri".

Për platformën e Forumit foli Njomza Emini, e cila tha se synohet ngritja e vetëdijesimit të familjeve kosovare dhe e gruas në veçanti. Në foltore u paraqit edhe Florie Shehu, nga Krusha e Vogël, e cila e falënderoi kreun AKR-së, i cili, sipas saj, është lideri i vetëm që po tregon ndjeshmëri dhe njëkohësisht po jep ndihmë për Krushën.